



## SLUŽBA ZA REVIZIJU FINANSIRANJA POLITIČKIH STRANAKA

Na osnovi člana 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), člana 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i člana 18. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2010. GODINU I POSTIZBORNOG FINANSIJSKOG IZVJEŠTAJA – OPĆI IZBORI 2010. SAVEZA ZA BOLJU BUDUĆNOST BOSNE I HERCEGOVINE

Broj: 03-07-6-446/11  
Sarajevo, 15.02.2012. godine

## **SADRŽAJ**

MIŠLJENJE REVIZORA.....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE .....	5
Predmet revizije.....	5
Cilj revizije.....	5
Obim revizije.....	5
4. PRETHODNE REVIZIJE .....	5
5. NALAZI REVIZIJE.....	5

## MIŠLJENJE REVIZORA

Služba za reviziju finansiranja političkih stranaka izvršila je reviziju finansijskih izvještaja Saveza za bolju budućnost Bosne i Hercegovine i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora održanih u oktobru 2010. godine.

Rukovodstvo stranke je odgovorno za finansijske izvještaje, postupanje u skladu sa Zakonom o finansiranju političkih stranaka i uspostavljanje efikasnog sistema internih kontrola.

Naša odgovornost je izraziti mišljenje na osnovi revizije koju smo izvršili.

Reviziju smo obavili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa Zakonom o finansiranju političkih stranaka.

Revizija je na osnovi uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Prema našem mišljenju, revidirani finansijski izvještaji ukazuju da je Savez za bolju budućnost Bosne i Hercegovine u 2010. godini postupao u skladu sa odredbama Zakona o finansiranju političkih stranaka, te da je troškove izborne kampanje finansirao u skladu sa odredbama člana 15.10 Izbornog zakona Bosne i Hercegovine.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je reviziju finansijskih izvještaja Saveza za bolju budućnost Bosne i Hercegovine i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora održanih u oktobru 2010. godine.

Revizija je preduzeta u skladu sa članom 14. stav (1) Zakona o finansiranju političkih stranaka («Službeni glasnik BiH» broj 22/00, 102/09 i 54/10), članom 24. Pravilnika o godišnjim finansijskim izvještajima političkih stranaka («Službeni glasnik BiH» broj 61/06) i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH», broj: 103/08).

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

U godišnjem finansijskom izvještaju za 2010. godinu Savez za bolju budućnost Bosne i Hercegovine iskazao je prihod u iznosu od 311.456,52 KM, što je iskazano u narednoj tabeli:

Red.br.	Vrsta prihoda	Iznos u KM	Učešće u ukupnom prihodu %
1	Članarina	0,00	0,00 %
2	Prilozi fizičkih lica	224.819,40	72,18 %
3	Prilozi pravnih lica	46.254,34	14,85 %
4	Prihodi od imovine	0,00	0,00 %
5	Prihodi od pravnih lica	0,00	0,00 %
6	Prihodi od poklona	0,00	0,00 %
7	Prihodi iz budžeta	34.069,07	10,94 %
8	Ostali prihod	6.313,71	2,03%
	<b>Ukupni prihodi:</b>	<b>311.456,52</b>	<b>100,00 %</b>

Prema podacima iz godišnjeg finansijskog izvještaja, Savez za bolju budućnost Bosne i Hercegovine ostvario je rashode u iznosu 1.398.143,70 KM.

## 2. PREDSTAVLJANJE POLITIČKE STRANKE

Naziv političke stranke: Savez za bolju budućnost Bosne i Hercegovine. Skraćeni naziv stranke je SBB BiH.

Politička stranka je upisana u sudski registar političkih organizacija 30.10.2009. godine kod Općinskog suda u Sarajevu pod registarskim brojem 065-0-F1-09-000035, sa sjedištem u Sarajevu, ulica Danijela Ozme broj 2.

Rješenjem Općinskog suda u Sarajevu, broj 065-0-F1-10-000007 od 31.05.2010. godine upisan je novi naziv političke stranke, Savez za bolju budućnost BiH – SBB Fahrudin Radončić i novo sjedište u ulici Tešanjaska broj 24a. Skraćeni naziv političke stranke je SBB BiH Fahrudin Radončić.

Rješenjem Općinskog suda u Sarajevu, broj 065-0-F1-11-000002 od 18.02.2011. godine, ponovo je promijenjen naziv političke stranke u Savez za bolju budućnost Bosne i Hercegovine, kao i skraćeni naziv stranke u SBB BiH.

Lice ovlašteno za zastupanje političke stranke je Fahrudin Radončić, predsjednik stranke. Lice ovlašteno za podnošenje finansijskih izvještaja za 2010. godinu je Kanita Imamović.

Prema podacima iz godišnjeg finansijskog izvještaja za 2010. godinu, organizacionu strukturu Saveza za bolju budućnost Bosne i Hercegovine čine:

- Centrala Saveza za bolju budućnost BiH Sarajevo,
- 40 organizacionih dijelova Saveza za bolju budućnost BiH na nivou općina u BiH i
- organizacioni dio Saveza za bolju budućnost BiH u Brčko distriktu BiH.

### **3. OPIS REVIZIJE**

**Predmet revizije** su godišnji finansijski izvještaj za 2010. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora održanih u oktobru 2010. godine Saveza za Bolju budućnost Bosne i Hercegovine, i to sljedećih organizacionih dijelova:

- Centrala Saveza za bolju budućnost BiH Sarajevo,
- Organizacioni dio Saveza za bolju budućnost BiH Goražde,
- Organizacioni dio Saveza za bolju budućnost BiH Bihać i
- Organizacioni dio Saveza za bolju budućnost BiH Tuzla.

**Cilj revizije** je da se na osnovi provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Savez za bolju budućnost Bosne i Hercegovine u izvještajnom periodu postupao u skladu sa odredbama Zakona o finansiranju političkih stranaka i odredbama člana 15.10. Izbornog zakona Bosne i Hercegovine.

**Obim revizije** finansijskih izvještaja Saveza za bolju budućnost Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na priloge fizičkih lica, priloge pravnih lica, prihode iz budžeta, kao i finansiranje izborne kampanje u skladu sa poglavljem 15 Izbornog zakona Bosne i Hercegovine.

### **4. PRETHODNE KONTROLE I REVIZIJE**

Izvršen je pregled godišnjeg finansijskog izvještaja Saveza za bolju budućnost Bosne i Hercegovine za 2009. godinu, nakon čega je izdat izvještaj o pregledu sa nalazima revizije, mišljenjem revizora i preporukom da stranka treba postupati po odredbama člana 11. stav (1) i (3) Zakona o finansiranju političkih stranaka.

#### **Realizirane preporuke:**

Savez za bolju budućnost Bosne i Hercegovine je ispoštovao preporuke date u prethodnom izvještaju revizije.

## 5. NALAZI REVIZIJE

Na osnovi obavljene revizije finansijskih izvještaja Saveza za bolju budućnost Bosne i Hercegovine i to: godišnjeg finansijskog izvještaja za 2010. godinu i finansijskog izvještaja za period od dana podnošenja prijave za ovjeru za izbore, do dana ovjere rezultata Općih izbora održanih u oktobru 2010. godine, a nakon što je stranka dobrovoljno otklonila nedostatke u godišnjem finansijskom izvještaju<sup>1</sup>, nismo zapazili ništa značajno što bi ukazalo na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

### Troškovi izborne kampanje

Savez za bolju budućnost Bosne i Hercegovine postupio je u skladu sa odredbama člana 15.10 Izbornog zakona Bosne i Hercegovine, odnosno ispoštovao je zakonom propisani limit na troškove izborne kampanje. U svrhu izborne kampanje stranka je potrošila 782.451,74 KM. Prema odredbama člana 15.10 Izbornog zakona Bosne i Hercegovine, politička stranka za potrebe izborne kampanje ne smije potrošiti više od 0,30 odnosno 0,20 KM po biraču u svakom izbornom krugu<sup>2</sup>, prema broju birača, koje je objavila Centralna izborna komisija Bosne i Hercegovine. Prema podacima Centralne izborne komisije Bosne i Hercegovine, Savez za bolju budućnost Bosne i Hercegovine u svrhu izborne kampanje mogao je potrošiti 3.131.889,00 KM.

## KOMENTAR

Nakon što mu je dostavljen preliminarni izvještaj revizije, Savez za bolju budućnost Bosne i Hercegovine, izjasnio se aktom broj: 59-03/2011 od dana 09.02.2012. godine, na nalaz revizije dat u Preliminarnom izvještaju o reviziji godišnjeg finansijskog izvještaja za 2010. godinu i postizbornog izvještaja – Opći izbori 2010.godine, na način, što je u skladu sa odredbom člana 13. stav (3) Zakona o finansiranju političkih stranaka, dobrovoljno otklonio nedostatke u godišnjem finansijskom izvještaju za 2010. godinu i o tome dostavio relevantan dokaz (korigovane obrasce).

Naime, politička stranka je izvršila reklasifikaciju prihoda u iznosu od 6.300,00 KM.

Zahvaljujemo ovlaštenom licu za finansijske izvještaje i zaposlenima u Centrali Saveza za bolju budućnost Bosne i Hercegovine za dobru i korektnu saradnju tokom obavljanja revizije finansijskih izvještaja.

Mr. Hasida Gušić – Šefica Službe za reviziju, revizor

Nevenko Andan – revizor

---

<sup>1</sup> U skladu sa odredbom člana 13. stav (3) Zakona o finansiranju političkih stranaka, prije izricanja kazne ili preduzimanja administrativne mjere, Centralna izborna komisija BiH će nastojati postići da politička stranka za koju je ustanovljeno da je prekršila odredbe ovog zakona, dobrovoljno postupi prema tim odredbama.

<sup>2</sup> Član 15.10 stav (2) propisuje da se maksimalno dozvoljeni iznos za finansiranje izborne kampanje izračunava na način što se broj birača u svim izbornim jedinicama, u kojima politički subjekt ima kandidatsku listu ili kandidata, pomnoži sa: 30 feninga za načelnika općine odnosno gradonačelnika i za članove skupštine općine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.